

Na osnovu člana IV.4 a) Ustava Bosne i Hercegovine, Parlamentarna skupština Bosne i Hercegovine, na __. sjednici Predstavničkog doma, održanoj __. __. 2020. godine i na __. sjednici Doma naroda, održanoj __. __. 2020. godine, usvojila je

ZAKON
O DOPUNI ZAKONA O OSNOVAMA SIGURNOSTI SAOBRAĆAJA NA CESTAMA
U BOSNI I HERCEGOVINI

Član 1.

U Zakonu o osnovama sigurnosti saobraćaja na cestama u Bosni i Hercegovini („Službeni glasnik BiH“ br.06/06,75/06, 44/07, 84/09,48/10,18/13,8/17, 89/17 i 9/18) u članu 187. dodaje se novi stav (3) koji glasi:

„(3) U vozačku dozvolu upisuje se informacija da je vozač saglasan da u slučaju smrti bude donator organa, ako osoba takvu izjavu potpiše prilikom podnošenja zahtjeva za izdavanje, zamjenu ili produženje roka važenja vozačke dozvole. U svim takvim situacijama neće biti potrebna saglasnost srodnika za donaciju organa.“

Član 2.

Sadašnji stav (3) postaje novi stav (4).

Član 3.

Ovaj zakon stupa na snagu osmog dana od dana objavljivanja u „Službenom glasniku BiH“.

Predsjedavajući
Predstavničkog doma
Parlamentarne skupštine BiH

Predsjedavajući
Doma naroda
Parlamentarne skupštine BiH

O B R A Z L O Ž E N J E

I. USTAVNI OSNOV ZA USVAJANJE ZAKONA

Ustavni osnov za usvajanje Zakona o dopuni Zakona o osnovama sigurnosti saobraćaja na cestama u Bosni i Hercegovini sadržan je u odredbama člana IV.4 a) Ustava Bosne i Hercegovine prema kojem je Parlamentarna skupština Bosne i Hercegovine nadležna za „donošenje zakona koji su potrebni za provođenje odluka Predsjedništva ili za vršenje funkcija Skupštine po ovom Ustavu“, te članu III.1.e) Ustava BiH, prema kojem je regulisanje međuentitetskog transporta u nadležnosti Institucija Bosne i Hercegovine.

II. RAZLOZI ZA DONOŠENJE ZAKONA

Za razliku od značajnog broja razvijenih i demokratskih zemalja, Bosna i Hercegovina trenutno ne predviđa mogućnost da se osobe izjasne da žele biti donatori organa u slučaju smrti. S obzirom da je odluke o tim pitanjima u pravilu neophodno donijeti u izuzetno kratkom roku od trenutka smrti, srodnici u takvim situacijama uglavnom nisu u stanju odlučivati o tim pitanjima.

Davanje mogućnosti građanima da se prilikom podnošenja zahtjeva za izdavanje, zamjenu ili produženje vozačke dozvole izjasne žele li biti donatori organa, značajno bi se pospješila učinkovitost tog postupka, te bi bili spašeni brojni životi.

III. RAZLOZI ZA HITNI POSTUPAK

U Skladu sa članom 133.(1) Poslovnika, Prijedlog zakona je formulisan na tako jednostavan način da se može usvojiti u jednom čitanju.

IV. PRINCIPI NA KOJIMA JE PRIJEDLOG ZAKONA ZASNOVAN

Ovaj prijedlog zakona je zasnovan na principima humanosti, promocije javnog zdravlja, društvene odgovornosti i solidarnosti.

Što se obrazloženja predloženih rješenja tiče, ona su kako slijedi: Članom 1. je precizirano da se u vozačku dozvolu upisuje informacija da je vozač saglasan da u slučaju smrti bude donator organa, ako osoba takvu izjavu potpiše prilikom podnošenja zahtjeva za izdavanje, zamjenu ili produženje roka važenja vozačke dozvole, te da u svim takvim situacijama neće biti potrebna saglasnost srodnika za donaciju organa.

Članom 2. je precizirano da dosadašnji stav (3) tog člana postaje novi stav (4).

Članom 3. je precizirano da zakon stupa na snagu osmog dana od dana objavljivanja u „Službenom glasniku BiH“.

V. PROCJENA FINANSIJSKIH SREDSTAVA ZA PROVOĐENJE ZAKONA

Za provođenje ovog Zakona nisu potrebna posebna finansijska sredstva.

VI. DRUGE OKOLNOSTI

Ovaj zakon prati najbolju praksu demokratskih zemalja u svijetu, koje svojim građanima omogućavaju da se na jednostavan način izjasne o ovim pitanjima, a što ima značajan pozitivan efekat na javno zdravlje, potiče solidarnost, te značajno smanjuje troškove zdravstvenog sistema u datoj zemlji.